



Akcija "Lift" Uhapšeni šverceri oružja

Naoružavali kriminalce?!

SARAJEVO - Pet osoba uhapšeno je u okviru akcije "Lift" zbog sumnje da su se kao organizovana kriminalna grupa bavili švercom oružja kojim su se, na ilegalnom tržištu, snabdijevale kriminalne grupe i počinioci raznih krivičnih djela u BiH, Srbiji i Njemačkoj.

Po nalogu Tužilaštva BiH akciju je sprovela SIPA, koja je u pretresima u Mostaru i Sarajevu zaplijenila veću količinu oružja, municije i vojne opreme.

- Akcija "Lift" bila je detaljno osmišljena i isplanirana. Uhapšeno je pet lica, a u pretresu kuća i vozila koje su oni koristili zaplijenjena je veća količina oružja. Grupa je pod istragom zbog sumnje da su tokom 2015. godine organizovano krijumčarili oružje, uglavnom pištolje, čije držanje i nabavka civilima nisu dozvoljeni. Više puta su krijumčarili oružje u BiH, Srbiji i Njemačkoj i prodavali ga na ilegalnom tržištu počinioci-



ma raznih krivičnih djela, čime su nanijeli veliku opasnost za opštu bezbjednost građana u BiH i inostranstvu - rekao je portparol tužilaštva Boris Grubešić.

S ciljem istrage on nije mogao da otkriva identitet uhapšenih, ni šta je tačno zaplijenjeno.

- Osumnjičeni su sprovedeni na saslušanje u Tužilaštvo BiH, nakon čega će biti odlučeno o prijedlogu za određivanje pritvora - kaže Grubešić. **O.M.**